

Minnesota Cov Qauv Kawm Ntawv Rau English Language Arts

Phau Ntawv Rau Tsev Neeg thiab Cov Saib Xyuas Me Nyuam Los Txhawb Koj Tus Me Nyuam Txoj Kev Kawm Ntawv

Cov qauv kawm ntawv (academic standards) yog dab tsi?

Cov qauv kawm ntawv yog cov hom phiaj kawm ntawv uas piav qhia tias cov tub ntxhais kawm yuav tsum paub dab tsi thiab ua tau dab tsi hauv txhua yam kawm thaum lawv kawm tiav ib qib. Cov hom phiaj no pab xyuas kom txhua tus tub ntxhais kawm hauv Minnesota tau txais kev kawm zoo uas npaj lawv rau txoj kev ua hauj lwm, kev mus kawm qib siab, thiab rau lub neej yav tom ntej.

Hauv Minnesota, peb muaj cov qauv kawm ntawv rau ntau yam kev kawm, suav nrog English Language Arts (ELA). Ib pawg kws qhia ntawv, neeg hauv zej zog, thiab cov kws tshaj lij yuav los tshuaj xyuas thiab hloov kho cov qauv no txhua 10 xyoo. Cov qauv rau ELA uas tau hloov kho nyob rau xyoo 2020 yuav tsum muaj coj los qhia rau txhua qib kawm pib rau xyoo kawm ntawv 2025–26.

Cov Qauv Kawm Ntawv ELA 2020 Sib Txawv Li Cas?

Cov Qauv Tseem Ceeb Rau Kev Kawm Ntawv (Foundational Building Blocks)

Kev nyeem ntawv thiab kev sau ntawv yog cov txuj ci tseem ceeb uas yog lub hauv paus rau kev kawm ntawv.

Kev Txhais Dav Dua Rau Lo Lus “Ntawv”

Lo lus “ntawv” tam sim no suav nrog ob hom ntaub ntawv: cov ntawv luam (xws li phau ntawv thiab ntawv xov xwm) thiab cov ntawv digital xws li xov tooj cua, yeeb yaj kiab, thiab websites.

Cov Ntsiab Lus Los Ntawm Ntau Txoj Kev Xav

Cov tub ntxhais kawm yuav nyeem cov ntaub ntawv uas muaj ntau txoj kev xav thiab kev pom, suav nrog cov kev xav ntawm Dakota thiab Anishinaabe.

Kev Paub Txog Media (Media Literacy)

Cov txuj ci paub txog media raug tso ua ke thoob plaws hauv cov qauv kawm, kom pab tau cov tub ntxhais kawm nkag siab, tshuaj xyuas, thiab tsim tau cov ntsiab lus nyob hauv tej ntawv digital.

Kev Koom Rau Tus Me Nyuam Los Xaiv Lawv Txoj Kev Kawm

Cov tub ntxhais kawm muaj sij hawm ntau dua los xaiv yam lawv xav kawm thiab los txiav txim siab kom meej thaum lawv los nyeem ntawv, sau ntawv, mloog, thiab hais lus.

Kuv Tus Me Nyuam Yuav Kawm Txog Dab Tsi?


Cov qauv kawm ntawv ELA 2020 hauv Minnesota raug faib ua peb ntu loj: (1) kev nyeem ntawv, (2) kev sau ntawv, thiab (3) kev mloog lus, hais lus, saib, thiab sib pauv tswv yim.

1. Kev Nyeem Ntawv: Kawm kom nkag siab cov ntaub ntawv los ntawm ntau qhov chaw sib txawv

- ✓ Kawm kom muaj cov txuj ci tseem ceeb hauv kev nyeem ntawv, xws li kev nyeem kom phim suab (phonics) thiab nyeem kom tau nrawm thiab du (fluency)
- ✓ Nyeem cov phau ntawv, ntawv sau, cov websites, thiab lwm yam ntaub ntawv kom muaj kev nkag siab
- ✓ Paub xav tob thiab tshuaj xyuas txog yam lawv nyeem thiab txawj nug cov lus nug kom muaj nuj nqis
- ✓ Nyeem cov ntaub ntawv uas sawv cev rau ntau yam kev xav thiab kab lis kev cai sib txawv
- ✓ Paub qhov txawv ntawm cov ntaub ntawv tseeb thiab cov ntaub ntawv tsis muaj tseeb los sis tsis txaus ntseeg

2. Kev Sau Ntawv: Sib qhia tswv yim thiab ntaub ntawv rau lwm tus

- ✓ Kawm kom muaj lub hauv paus zoo hauv kev sau ntawv, xws li kev siv grammar thiab punctuation kom raug
- ✓ Sau ntawv rau ntau yam hom phiaj hauv lub neej tiag—xws li kev qhia, kev sau kom lwm tus ntseeg, kev sib cav, los sis kev tsim
- ✓ Siv txheej txheem sau ntawv uas muaj kev npaj, sau thawj daim qauv, kho dua tshiab, thiab kho kom raug
- ✓ Qhia lawv lub suab thiab kev xav hauv lawv cov ntawv sau
- ✓ Tshawb fawb txog cov ntsiab lus thiab siv pov thawj los txhawb lawv cov tswv yim



3. Kev Mloog Lus, Hais Lus, Saib, thiab Sib Pauv Tswv Yim: Kev sib txuas lus thiab kev koom tes ua hauj lwm nrog lwm tus

- ✓ Mloog lus kom zoo thiab hais lus kom meej thaum sib tham
- ✓ Qhia lawv cov tswv yim thaum tseem hwm lwm tus tej kev xav
- ✓ Koom tes ua hauj lwm nrog cov phooj ywg kawm ntawv rau tej dej num thiab hauj lwm
- ✓ Qhia thiab piav qhia cov ntaub ntawv rau ntau hom neeg mloog sib txawv
- ✓ Siv cov ntaub ntawv digital kom muaj kev nyab xeeb, muaj kev txawj tshuaj xyuas, thiab muaj kev xyuam xim



Qhov No Zoo Li Cas Hauv Koj Tus Me Nyuam Lub Chav Kawm Ntawv?

Lub xeev Minnesota tau teeb cov qauv kawm ntawv no rau txhua tus tub ntxhais kawm nyob thoob plaws lub xeev. Tiam sis, koj lub tsev kawm ntawv yuav yog tus los txiav txim txog tias yuav qhia cov qauv no li cas. Qhov no suav nrog:

Kev Kawm Ntawv (Curriculum):

Cov phau ntawv, cov kev pab cuam, thiab cov ntaub ntawv uas cov xib fwb yuav siv qhia.

Txoj Kev Qhia Ntawv:

Txoj kev uas cov xib fwb yuav siv los qhia pab cov tub ntxhais kawm kom kawm tau cov ntsiab lus thiab txuj ci ntawm ELA.

Kev Ntsuam Xyuas:

Cov hauj lwm los sis cov kev xeeb uas siv los ntsuas seb cov tub ntxhais kawm kawm tau li cas raws cov qauv kawm ntawv.

Yog koj xav paub ntxiv txog yuav qhia cov qauv ELA li cas hauv koj tus me nyuam lub tsev kawm, los yog xav qhia koj tej tswv yim txog koj tus me nyuam txoj kev kawm, ces tham nrog tus xib fwb los sis tus thawj tswj (principal) ntawm lub tsev kawm ntawv.

Nkag Siab Txog Kev Xeeb Hauv Lub Xeev: Qhov Kev Xeeb Reading MCA

Cov tub ntxhais kawm qib 3 txog 8 thiab qib 10 yuav xeeb qhov Reading Minnesota Comprehensive Assessment (MCA) txhua lub caij nplooj ntoos hlav. Qhov kev xeeb no phim raws li ntu Kev Nyeem Ntawv hauv cov qauv tshiab ntawm ELA thiab qhia tau meej txog tus me nyuam txoj kev kawm. Cov qhab nia xeeb no pab cov tsev kawm ntawv txiav txim seb lawv qhia cov qauv kawm ntawv puas tau zoo. Yog koj muaj lus nug txog MCA los sis koj tus me nyuam cov qhab nia xeeb, mus nrog koj tus me nyuam tus xib fwb tham.

Kuv Yuav Txhawb Tau Kuv Tus Me Nyuam Txoj Kev Kawm Ntawv Li Cas?



- Nrog tus xib fwb sib txuas lus los qhia txog yam koj tus me nyuam nyiam, nws lub zog, thiab tej yam nws xav tau kev pab ntxiv
- Koom tes nrog lub tsev kawm ntawv kom pab txiav txim siab txog cov phau ntawv, cov kev pab cuam, thiab cov ntaub ntawv siv qhia ntawv
- Nyeem ntawv nrog koj tus me nyuam thiab tham txog yam neb tau nyeem
- Ua si nrog kev hais lus los ntawm kev hu nkauj, kev hais paj huam, thiab kev ua si nrog lo lus
- Sau ntawv ua ke rau tej yam siv hauv lub neej tiag, xws li sau daim ntawv ua tsaug, daim ntawv yuav khoom, los sis dab neeg txog tsev neeg
- Tham txog tej xwm txheej tshiab hauv zej zog thiab ntiaj teb, thiab tham txog ntau hom kev pom
- Ua qauv zoo rau kev siv technology [thiab qhia siv kom nyab](#) xeeb

Yog xav tau kev pab ntxiv rau kev txhawb tus me nyuam txij thaum yug los mus txog 9 xyoos rau txoj kev nyeem ntawv, mus saib [Families READ Toolkit](#) ntawm <https://education.mn.gov/MDE/dse/READ/eng/toolkit/> los sis thaj qhov QR code no:



Yog xav paub ntxiv txog Minnesota cov qauv kawm ntawv ELA, mus saib [Minnesota Department of Education ELA qhov webpage](#) ntawm <https://education.mn.gov/MDE/dse/stds/ela/> los sis thaj qhov QR code no:

